

Kolesaga Koneai Bidigo Pusali Po Elalubo Buku

Hasia Nedebo Po

Te e bukude, kolesaga konea pai bidi me deligo, ma po ola mabo bidigo homu kolesagade po pusali. Te kolesaga mu konea pai bidi agai te nai hauwade homu konea pabo bidi, tama te we bidi dabe augwali bilibo page me, bidabo ula page me, tigidali badu bugagia osola subo bidi dao. Agai suali, te nai hauwago te aga haliga sege ilibo suali. Agai suali, te we bidi dabe augwaligo bidabo ula te pewadage elalu, te wiegi yai elalubo homu me ebeo. Te se hauwa te bidi dabego ebo se de te wiegi yai nai tede me pedalubeo. Tibaso, te bidigo te tiwai po pusalio, te da we bidigo bidibo ula te page meni yai elalubao.

God aga te dago bidibo ulago Aya da, tiali goli da we bidigo te Godigo kolesaga page mu bugagia koneabo usu ebeo. Te tobage sege yai pogo te po odabo mu hagela ilali, tiali goli te kolesaga koneani bidigo te dago hagela naga igimio po wali. Te dago konesiabadi digi, tagalao, te dago se dene eyu, te pewadage sogo pemene homu elama bidinao, te Godigo da deli delibolo te e t qde bidabo bodolu mawai dao.

Bidi hauwago te tobage po te buku me delide te tobage po te Buk Baibel tomode elalubaso, te augwa sulama, midigi mu sabo dao. Tialima, te nai me deli te bukude dabolo ola mani, e tiwai elalubao. Bidi me deli te haniani haliga segego aga dolobo bidi bidali, te tiwai aga me te Godigo we wai bidi hani tomode bidibao. Te e buku tego te bidi hauwa mu tau sabo se yai dao, magi baso meni, augwaduba digi te haliga sege dali bidiyu, te homu hauwa idubao, te po tiwai si te kolesaga koneani bidigo te e bukude aseani elalubao. Augwaligo te buku nedebo sogo, augwaligo koneama, te augwaduba me bidibe da homu yali. Te tama tebogo augwali tau siyu, te Godigo daq wali wiegi yai po te Baibelde te gasa badu elalubo pode te augwaligo homu kone me palobo se eyu bidibo dao.

Tigidali nai te olo nai mu tiwai dao

- 1** Te kolesaga mu konea pai bidi me deligo po pusali. Te kolesaga koneani bidi te Devitgo ogwa da, tama polobadu aga Jerusalemde king bidi bidai dao.
- 2** Te kolesaga mu konea pali bidigo te tama po walio,

tigidali nai te olo nai tiwai mu elalu,
te nai dabego aga page mu me elalubeo.

- 3 Dago sę dene mu te kibu be hauwade ebao.
Tialima, dago mena wiegi yai nai dabe
te sę dene yalide sabo dawę?
- 4 Te we bidi dabe augwali isibaso,
te gesi we bidi hani ma pedelama,
te augwali bidali pesage ma hasegelibao.
Tiali digi te tų da, me hasegelibeo.
Sesemane sogo aga elalubo tiwai
naga me tama elalubo dao.
- 5 Tigidali sogo giliga nanudu gebao,
tigidali sogo aga iba dega siguludubao,
tama ma geasa pelama,
te gasa sogo bubugade ma nanabo sisi elalubao.
Sesemane sogo te giliga ge aga tama naga tidubadi,
aga homu hę mu wabo dao.
- 6 Wali te not badu hogodama,
te saut badu pedaiba solama, te ma begelama,
te not badu soabo da.
Te tama kolesaga eyu, te wali sesemane sogo
bagula bilibo dao.
- 7 Te tigidali asobo aı te tamu aıba udula pobao,
tiali goli te tamu aı me paęaębeo.
Nosali, te aı dabe te asaliba ma begasa holaibao,
tama ma dulubo dao.
- 8 Dago e tųde tigidali naide homu kone paludu,
te dago augwalide hagela mu ebo da.
Dago te hagela ebo po hanilama
pusubaso, usu me egobeo.
Dago te tobage nai dabe sulama,
te tobage po dabe odobadi yali,
tiali goli te tebo sęgo da haliga pemene ilama,
mu usu nabo me ebo menio.
- 9 Te polobadu pedelali nai dabe da,
te nosali ma pedalubo da.
Te bidi dabe augwaligo te polobadu yali sę dabe,
te sę dabe gasa bidi dabego ma yaibao.
Te e tųde gesi sę me elalube dao.

- 10 Te me sogo te bidi dabego te tama po obao,
 “Te e da, te gesi noma nai me deli da,” po wali.
 Tiali goli, te menio.
 Polobadu mu digi te nai me elaluali,
 te da e t̄de ame nenama bidis̄badi
 te nai elaluai dao.
- 11 Te bidi me deligo te polobadu bidali bidi hani,
 te w̄i n̄q̄ dabe augwalide
 te homu ma kone palobo menio.
 Tama da tudi badu pedelabo bage,
 te nosali badu mu pedalubo bidi dabe
 augwaligo te bagede homu kone me palogobe da.

Genuai kolesaga koneani te olo nai tiwai da

12 Ena te kolesaga koneai bidi, ena te Israel dabego king bidu, te ena Jerusalemde bidai dao. 13 Eno te e t̄de pedelali nai tigidalide homu kolesaga koneabo homu mu yali, tama eno te page hania mu bugagia dagala sigi da homu kone palali. Tiali goli, te s̄ Godigo dabolo mani te genuai s̄ḡ mu elalubo dao. 14 Eno te t̄de pedalubo nai tigidali sula silali, te mu tama, te nai dabego page mu me elalusīwai, te bidi me deli udayu, te wali nogogo tola sainu ebo tiwai ebo dao.

- 15 Te gagea pali nai dabe,
 te dago dodolainu ebo usu egobeo.
 Te elalusīwani nai dabe, te dago me nedegobeo.

16 Eno te tama homu yali, eno te genuai homu kolesaga mu koneani, tama te polobadu Jerusalemde king bidali bidi dabego koneani homu kolesaga tigidali aiyaba elaluali. Eno wiegi yai homu kolesaga mu koneai dao.^a 17 Eno te wiegi yai homu kolesaga hanilabo s̄ bomo yali, te kolesaga umuna pabo tobage s̄ page me gegabo s̄ bomo yalio. Tiali goli, ena odolali s̄ dene yali, te bidi me deligo te wali tola sainu pobebo tiwai yalio.

- 18 Mu tama, te homu kolesaga hauwa koneani bidigo,
 te aga homu kone kolesaga konebo
 te genuai uga uga ela holobo sogo,
 te agai haliga s̄ḡ genuai mu pedalubo dao.

Te pemene ebo tobage kolesaga dabe te olo nai tiwai elalubao

2 1 Eno te tobage pemene homu yabo kolesaga usu sabo homu yali.
 Tama ena godolo homu simina ela silaibao homu yali. Tiali goli, te

^a 1:16 1 Kin 4:29-31

tama kolesaga me page meni yai dao. ²Eno gegelama, te tiwai koneani, te gisugu wabo kolesaga te dobo kolesaga da homu yali. Te homu pemene ebo kolesagago te da dwasianu tau sabo usu meni yaibao. ³Eno te wiegi yai homu kolesaga page gegelama, suainu ebo sę yali, eno te wain aꞑ tubo kolesaga usu siyu, te tobage pemene homu ebo kolesaga dabe yali. Eno te gegelama koneainu yali, te mena sę mu te we bidi augwali te dwasianu pęwadage sogo e tęde wiegi yai bidabo te koneainogo yai dao.

⁴Eno te genuai sę hauwa yali. Eno ena be te genuai genuai be dabe sęnama, tama eno te wain gi dabe bulali. ⁵Eno te gide bulali nai dabe me, tama te gide te tobage du walobo wiegi yai ni du dabe elalui dao. ⁶Eno te dwasianu sigi aꞑ ge dabe nigilama, te ni du gi dabeba aꞑ sagaduabo nidigili palio. ⁷Eno sę olo yabo sę bidi, me sę olo yabo we me hauwa abelali. Tama te olo sę ebo bidigo wai dabe, me te olo sę ebo wego wai dabe te eno sę olo yabo we bidi pedelali. Te eno bulmakau me sipsip hani hauwa mu elaluali. Te Jerusalemde polobadu bidali bidi dabego te bulmakau me sipsip eno elalubo nai tiwai me elalubeo.^b ⁸Eno te silva me gol hauwa elaluali, me te eno tonalubo tę kantri pedai king dabego me augwa wiegi yai dila pai nai dabe enaba mayu yali. Eno te we bidi meba sisinama, te augwaligo enaba wiegi yai homu pemene ilabo tęaꞑi po omainu yali. Te eno te me badu hani we hauwa selama, te ena homu pemene mu ilibo sę yai dao.^c

⁹Eno te tama nai dabe doado bage saligo te ena genuai bidi mu pedelali. Te Jerusalemde polobadu bidali bidi dabego nai te eno megi elalubo nai tiwai me elalubeo. Tama te sogo ena te homu kolesaga mu konea pai bidi me bidai dao.^d ¹⁰Te eno homugo godolo yali naide homu dwasianu me geaꞑ sabeo. Mu menio. Te eno homude nai me deli godolo ebo sogo da, teda te nai eno siyu naga yali. Te eno ena ebo sę tigidalide wiegi yai homu pemene mu eyu, te pemene yali te sego mone sabo tiwai yali dao. ¹¹Tialima, nosali ena te sę dene elama sali nai dabeba homu kone palama, eno te tiwai koneanio, te tigidali nai te olo nai tiwai da, te homu eyu, te nai dabego ena dwasianu tau sogobe da homu yalio. Te bidi udulama, te soabo wali nogogo tola sainu ebo olo sę tiwai ebo dao. ¹²Eno te sę dabe ela silama da, teda te gasa bidigo ena hasegelama, te king pedalubo sogo da, teda agai mena tobage gasa sę yaibawe? Mu menio.

Wiegi yai homu kolesaga te olo nai tiwai dao

Tama te nosali pedalubo sę page dago kuna koneasiabaso, eno te wiegi yai homu kolesaga ebo page me, te wabo pabo bidigo ebo kolesaga page me homu kone palobo sę eyu yai dao. ¹³Eno homu kone palama, te tiwai tama koneani, te wiegi yai homu kolesaga te dwai wabo pabo

^b 2:7 1 Kin 4:23 ^c 2:8 1 Kin 10:10, 14-22, 23-27; 2 Sto 9:22-27 ^d 2:9 1 Sto 29:25

bidigo ebo kolesaga aiyaba mu elaluama, te be posobo ula ebogo te be hulua sabo aiyaba elalubo tiwai ebo dao. ¹⁴Te homu kolesaga mu konea pai bidi dabego te augwa wali pabo sunumi bugagia sueibao, tiali goli te wabo pabo homu kolesaga tiwai ebo bidi dabe te hulide bilibo tiwai yaibao. Te mu da wali, tiali goli eno gasa nai me koneanio. E tiwai da. Te homu kolesaga konea pai bidi silagasobo gilama tiwai, te wabo pabo homu kolesaga ebo bidi me te tiwai gilama silagasu ebo dao. ¹⁵Eno te tiwai homu ebao, te wabo pabo homu kolesaga tiwai elalubo bidi dabeba pedelainu ebo nai tiwai, te enaba me pedelaibao homu yali. Tialima, eno te koneani homu kolesagago te ena magi elama tau sogowe? Te eno homu kone ma palobo te tiwai ebao, te koneani homu kolesaga elalubo bidi me te olo nai tiwai da te homu ebo dao. ¹⁶Magi baso meni. Te nosali sogo, te we bidi augwaligo da homu kone ebo mu gegeda palaibao. Te da wabo pabo homu kolesaga elalubo bidi, ma te homu kolesaga mu konea pali bidi me tagalao, te augwaligo homu kone palobo se munu ma egobeo Te isibo sogo, te homu kolesaga konea pali bidigo te wabo pabo homu kolesaga tiwai bidi aiyaba me elalugobeo. Menio. Da tigidali isaibao. ¹⁷Tialima, te ena bidabo ula te eno hagela ilibao, magi baso meni, te tode pedalubo nai tigidaligo ena genuai sege mobao. Te nai dabego page me elalubo menio. Te bidi uduyu, te asobo wali nogogo tola sainu ebo tiwai ebo dao.

Se dene ebogo page me elalubeo

¹⁸Eno koneanio, eno te se dene elama pedelali nai dabe taga paibao, te ena bidali se hasegelama sabo bidigo saibao. Tibaso, eno te nai dabede hagela homu ebo dao. ¹⁹Tama ena te bidali pesage hasegelibo bidi da, eno konebeo, aga te homu kolesaga mu ula tega pai bidi mu, ma te wabo pabo homu kolesaga elalubo bidi tiwai yaliwe? Konebeo. Tialima, agai eno te wiegi yai konea pali homu kolesagade se dene elama pedelali nai tigidali tonalueibao. Te tama kolesaga me aga page meni yai elalubao. ²⁰Tialima, eno ena te se dene yali dabede homu kone palu, te ena dwai haliga mu yai dao. ²¹Eno te tiwai homu ebao, te bidi mebago te se bugagia yabo skul olama, te wiegi yai homu kolesaga koneani elalu, te augwa se dene elama, te nai hauwa sali. Tama nosali augwali isibaso, te gasa bidi dabego te nai dabe olo saibao. Te kolesaga dwai mu ebao, tama te page meni yai mu elalubao. ²²Da e tode bidiyu, sesemane sogo dago se dene eyu, te nai dabede homu hauwa dogia paibao, tiali goli tego magi nai mu dabolo wei ponaiabwe? ²³Da e tode bidibo sogo, tigidali naigo da homu kone tuq palama, mone homu sege hauwa ilaibao. Te hulide dago homu kone palubo se hauwa dogia pidubadi, te dago toma me tusiwaibao. Te tebo kolesaga me page meni yai elalubao.^e

^e 2:23 Jop 5:7; 14:1

²⁴Dago nai me aḡ me tuyu, te dago yali seḡe wiegi yai homu pemene eyu bidibaso da, teda usu dao. Po meni. Te seḡ da bidigo naga me ebeo. Menio. God agade digi te page elalubao.^f ²⁵Magi baso meni. Te Godigo dabolo te nai tuyu, pemene homu yao wagi menigi sogo da, mena tama dago te tama kolesaga igi dawe? ²⁶Te we bidi mebago te Godigo homu wali pobaso, tama agai augwali dali dwagi yai homu ebo dao. Agai augwaliba te wiegi yai homu kolesaga menama, te augwali pemene ilibo dao. Tiali goli, te tobage kolesaga isaḡwai bage, te dwai seḡ ebo bage yaibaso da, teda agai augwaliba te seḡ dene menama, te sali nai hauwa te sisinama, te Godigo dwagi yai homu ilibo we bidi augwaliba momainu ebo dao. Te seḡ dene eyu, doado bage hauwa sabo kolesaga me te page meni yai elalubao, te bidi udayu, te wali nogogo tola sainu ebo tiwai ebo dao.^g

Godigo te tigidali seḡ yabo sogo bodolu muai dao

3 ¹Tigidali nai e tḡde pedelama elalubo, te aga bodolu muani sogode digi pedalu ebo dao. Awe, te tigidali haniani seḡ deli deli te dolo si kadu walio.

²Godigo bidi da e tḡde ame nabo sogo
bodolu daḡ muani,

te isabo sogo bodolu me muanio.

Agai te nai wai bulabo sogo bodolu daḡ ilibadi,
te nai gudabo sogo me bodolu muai dao.

³Agai te bidi ela muabo sogo bodolu mubadi,
agai gasi ebo bidi ma usu ilabo sogo bodolu mubadi yali.
Agai te nai dabe huḡiabo sogo bodolu muyu,
te nai dabe nigabo sogo bodolu muyu yai dao.

⁴Agai te gela wabo sogo muyu, te gisugu wabo sogo
bodolu muyu yali.

Agai te hobede yabo sogo muyu,
te teḡbi po wabo sogo muyu yalio.

⁵Agai te dago te masigi dabe
sela saḡbo sogo bodolu muyu,
me te masigi dabe dago deliba
sisinabo sogo bodolu muyu yai dao.

Agai te bidigo aga we dali pagela
piabo sogo bodolu muyu, te we dali pagela
pisḡbo sogo bodolu muyu yai dao.

⁶Agai te nai hagawai gegabo sogo bodolu muyu,

^f 2:24 KB 3:13; 5:18; 9:7; Ais 56:12; Luk 12:19; 1 Ko 15:32 ^g 2:26 Jop 32:8; Prs 2:6

- te hagawai nai tagalabo sogo bodolu muyu yali.
 Agai te nai doado bage bugagia
 muabo sogo bodolu mubadi,
 te nai dabe sela şabo sogo bodolu muai dao.
 7 Agai te ugwa pişa yabo sogo bodolu muyu,
 te hobolabo sogo muyu yali.
 Agai te bidi dago pedauwali panibo sogo muyu,
 te po wabo sogo mubadi yai dao.
 8 Agai te bidi dago gasa bidi
 godolo mu yabo sogo bodolu muyu,
 te bidi dago gasa bidi hasi godolo menişabo sogo
 bodolu muyu yali.
 Agai te hwişbo sogo muyu,
 te bugagia bidabo boi pibo sogo bodolu muyu yalio.

9 Te şe ebo bidi dabe, augwaligo te mena wiegi yai nai dabe augwa te ebo şede sabo dawe? 10 Te tobage şeşę tigidali Godigo dabolo mubo eno mu konea palio. 11 Godigo digi te tigidali nai pedelabo sogo bodolu muani, tama augwali te wiegi yai sogo bodolu muanide mu pedelaibao. Tama me agai dago homu hodolama, tama dago te polobadu pedelali nai dabe konemai da homu eyu, tama te nosali pedelabo nai me konemainu homu eyu tama tiali. Tiali goli, Godigo aga polobadu digi ela pali şe tigidali te nosaliba mu usu nama, te dago mu konemainu ebo şe ebo. 12 Eno te naide homu kone palama, tama eno koneani, te uganu ela holobo kolesaga me deli elalubao. Te kolesaga e tiwai dao. Dago wiegi yai pemene eyu, te wiegi yai kolesaga da e tşde bidadubadi ebaso, te usu yaibao. 13 Tama me, dago nai me aşı me tuyu, te dago ebo şe tigidalide wiegi yai homu pemene emainao. Te Godigo dabolo te tobage wiegi yai homu pemene ilibo şe dabolo mabo dao. 14 Eno koneanio, te Godigo kolesaga me hasegeligobeo. Menio. Te sesemane sogo elalua pidu, elalua paibao. Niwai bidi me deligo kolesaga te Godigo kolesaga dabeba wadolobaso, usu me egobeo. Te niwai bidi me deligo te Godigo kolesaga me huşia şayu, sela şagobeo. Godigo te tiwai şe yali, te we bidi dabe augwali agade wi eyu, aga dologode naga bidimainu yai dao.

- 15 Te megi pedalubo nai tigidali,
 augwali te polobadu pedelalio.
 Te nosali pedelabo nai tigidali,
 augwali me polobadu pedalali.
 Godigo te polobadu pedelali nai tigidali
 te me tama elalua pomainogo iligobeo. Menio.
 Agai te nai dabe ma holomainu ilibo şe ma ebo dao.

Te we bidi augwaligo kolesaga dolo me ebeo

¹⁶Eno te t̄de gasa kolesaga me elalubo suali. Te wiegi yai doloba pai kolesaga wali pabo s̄e elalubo bidi dabe, augwaligo te kolesaga wali ma pabo meni. Menio. Augwaligo dwai kolesaga mu wali pabo dao.

¹⁷Eno tede te tama homu yalio,
 te Godigo we bidi dabe augwali po t̄ ilibo sogo,
 agai te doloba pai kolesaga tigidali yali bidi dabe,
 me dwai kolesaga yali bidi dabe
 dagalobo sogo d̄i ilali elalubao.
 Magi baso meni, te tigidali s̄e yabo si te elalubao,
 te tigidali yali kolesaga
 ma dodolobo sogo me elalubao.

¹⁸Tama me eno te tama homu yali, te da bidi dabe da, Godigo da usu siyu, dabolo te tiwai ola mobao, da bidi dabe te kibu hasa dabe tobage tiwai si naga elalubao. ¹⁹Magi baso meni, da bidi silibo te hasa dabe tiwai si ebao. Te hasa dabe isaibao, te da bidi me isaibao. Bidi me, hasa me, te mobo kekebo da, te tama tebo te si dali sigo bidibo ula elalubao. Tibaso, te bidigo bidibo ulago te hasago bidibo ula aiyaba me elalugobeo. Menio. Augwali sigo bidibo ula te olo nai tiwai si tiwai dao. ²⁰Godigo t̄ selama, augwali si nigali, tialima augwali si isibo si da, te augwali si t̄ tiwai ma pedelaibao. ²¹Bidi mebago homugo te bidigo noma mobo te ugwaba holobo homu, te hasa dabego mobo noma te t̄ba aiyaba dulubao homu ebao. Tialima, dego mu te s̄e page koneabo usu yaibawe? ²²Tama tibaso, eno te tama s̄ede homu kone palama, eno koneani, te kolesaga me deligo uganu igulai mu elalubao. Te kolesaga e tiwai elalubao. Te da isibo si, te nosali e t̄de pedalubo s̄e te dago konegobeo. Tama tibaso, dago megi ebo s̄e tigidalide wiegi yai homu pemene inao. Magi baso meni, Godigo dago te s̄e emainu bodolu muai dao.

4 ¹Te tobage dolo isāwai kolesagade eno homu kone ma palali, te t̄de we bidi augwaligo ebo kolesaga da.

Te dwai s̄e ebo bidi dabego te we bidi
 hauwa aiyaba elalubaso,
 tama te we bidi augwali dwai mu gela wali.
 Tiali goli, augwali tau sabo bidi meni yai.
 Magi baso meni, te dwai s̄e ebo bidi dabego
 bomo hauwa elalubao.

²Eno te tama homu yali,
 te isali bidi dabe augwali da, te usu mu yalio.

Magi baso meni, augwali da, te seḡe meni ebao,
 te da tḡde bidibo bidi dabego
 seḡe sabo tiwai me ebo meni.

³ Tialima, e tḡde ame nisiḡwani we bidi hani dabe,
 augwali ugwanu ela holama, te isali bage dali,
 te megi bidibo bage dali si aiyaba
 elalubo dao. Magi baso meni,
 augwaligo te bidi dabego dwai
 kolesaga e tḡde ebo munu me subeo.

⁴ Tama me eno gasa kolesaga sualio. Te bidi dabe augwali seḡ dene mu elama, te tobage wiegi yai nai dabe nigibao. Tialima, te page e tiwai elalubao. Augwaligo homude te augwa abagi dabego genuai nogi elalu, te nai hauwa elaluba homu yali. Tama tibaso, augwaligo me te seḡ dene hauwa eyu, te abagi dabe augwali genuai nogi elalubo tiwai augwali me bidabo homu yali. Te wabo pabo homu kolesaga tiwai mu ebao, te bidigo wali nogogo tola sainu udabo tiwai gilama ebo dao. ⁵ Te bidi dabe augwaligo te tiwai po obao,

Te bidi olo dugulalu, seḡ isaḡo bidi da,
 aga te wabo pabo bidi tiwai ebao.

Te agai bomo sia siyu, te aga isaibao.

⁶ Tialima, eno tama homu ebao,
 ma, bidigo dwasianu nai elaluyu,
 tama aga haliga nagamea pai eyu bidibaso da,
 teda te bidi bugagia bidibao.

Tiali goli, te doado bage hauwa elalubo bidi,
 aga tede moni homu eyu,
 aga seḡ sesemane sogo bomonama
 ebo bidi da, aga dwai bidibao.

Agai te wali nogogo tola sainu
 ebo tiwai ebo dao. Te dwalio.

⁷ Eno te gasa page meni yai kolesaga me suali. Te kolesaga e tama tiwai elalubao.

⁸ Te yḡya pai bidi deli bidali.
 Aga wai me, aga ama me meni yai,
 tiali goli, sesemane sogo agai seḡ
 naga ela pidubadi geani,
 te aga dwasianu toma me nabeo.
 Agai doado bage hauwa elaluali,

tialima te nai dabe aga usu meni homu yali.

Agai te tiwai homu ebeo,

“Magi baso ena odolali sę dene eyu,

te eno pemene meni ebawe?” te homu ebeo.

Te tobage bidigo kolesaga te hobedagia mu elalu,

te aga page meni yai elalubao.

⁹ Te bidi agaduba deli bidibaso, te wiegi yai me ebeo.

Te bidi si bidibaso, te wiegi yai da.

Te bidi si kisasa sę ebaso da,

teda augwali sigo sę te wiegi yai mu pedelaibao.

¹⁰ Ma, te bidi me deli te tulalubaso da,

teda gasa mego aga ugwaba

ma sagolobaso, usu yaibao.

Tialima, te bidi agaduba deli bidali bidi

te tulalubaso, te hobede mu ebao.

Te aga tau sabo bidi meni ebao.

¹¹ Te augwali si kedau ebaso da,

teda augwa si deliba pageasa piao,

tama augwa si kedau me egobeo.

Tialima, te deli naga bidali da,

te magi elama aga digi aga tigi posolo ilaibawe?

¹² Te boi bidigo deli dali hwıbaso,

te boi bidigo aga aiyaba elaluabo homu ebao.

Tiali goli, boi bidigo bidi si dali hwıbaso

te aga usu meni da homu yaibao.

Awe, te tiwai me, te augwaligo

dila pai hobi sela selama, te haliga tubaso da,

teda te haliga polo me togwa pogobeo.

¹³⁻¹⁴ Te magi nai meni yai bidi me deli, ma kalabus bidi me deli, te tobage bidi si te tų kantri pedai tonalubo bidi king pedelali. Tialima, te king monu dabe pedalubo sogo, te bidi dabego agaba te wiegi yai homu kolesaga momainu yali goli, agai augwaligo po odobeo. Teda aga dwai king dao. Me ma, te wiegi yai homu kolesaga elalubo gesi bidi, aga magi nai meni yai goli, te bidi agai te tobage monu dabe king bidi aiyaba elalubo dao.

¹⁵ Eno suali, te monu dabe king bidi isibaso da, te gesi ogwa bidigo agai pesage selama, te king pedelali. Tama te tigidali tų pedai we bidigo te gesi king bidi wali pai, te eno suali. ¹⁶ Agai te genuai hani we bidi mu tonaluai, te bidigo augwali nedabo usu meni yaibao. Tiali goli, aga te isiyu da, augwaligo

te agai yali genuai se dabe homu kone ma palogobeo. Te kolesaga me aga page meni yai elalubao, te bidi udulama, te wali tola sigi painu ebo tiwai ebo dao.

Tiyu odolali nago ugwadu homugo God dali po daw wagio

5 ¹Nago te Godigo beba pabo sogo, naga yali kolesaga bugagia homu kone palama pao. Tiyu nage odolali pabuo. Te nago kolesaga sainu pobaso, te wiegi yai da, tiali goli te odolali ofa ebo tagalao, te kolesaga sisawai bidi dabego elalubo kolesaga tiwai igio. Te tobage bidi dabe augwaligo te mena se te Godigo gedude dolo elalusiaɓo da, te homu konebeo.

² Homu kone bugagia bolo palama,
tama nosali nage hogodama, po pusao.

Te nago God dali po mibo sogo,
nago po hauwa odolali wagio.

Magi baso meni,
dagalude bidibo Godigo bomo genuai elalubao,
tama da olo bidi e tɔde naga bidibao.

Tibaso, nago po hauwa aga dali me olamo dao.

³ Te nai hauwade nago moni homu
hauwa dogia peyu da, te nago na hauwa yabuo.
Te nago po me hauwa obaso da,
teda nago po gani bole odolali weyu,
te wabo pabo bidigo po wabo tiwai igio wali.

⁴Te nago Godiba po daw wai digi, nago te daw wali po polo usu nao. Godigo te dwagi yai homu kolesaga sabo hagela homu ebo bidi dali dwagi yai homu egobeo. Tama tibaso, nago te daw walali po polo usu nao.^h ⁵Ma, nago te daw walobo po wasiabaso da, teda te usu dao. Tiali goli, nago God dali bomai po me deli daw walobo po wai digi, tama nago te daw wali po wali pisabaso da, teda te dwai mu dao. ⁶Tiyu, nago po odolali daw wali digi te nage sege sabuo. Te nago po me deli daw waibaso da, teda nago nosali prisba te tama po ma waligio, nago bugagia homu kone palisama, nago te po daw wali. Magi baso te Godigo nage dali haliga sebe ilibaso, te agai nago se dene elama sali nai dabe dolabuo. ⁷Nago te na hauwa ebo bidi goli, ma nage te po hauwa wabo bidi, odao. Te tobage kolesaga ebo te page meni yai kolesaga naga dao. Nage te God dologode sesemane sogo bidao.

Te moni bidi pedelabo homu ebo tagalao

⁸Gavman bidigo te magi nai meni yai bidi dabeba sege mabo nago subaso, te nage homu dwagila hogodigio. Ma, te po tu ebode augwaligo po bugagia

^h 5:4 Tib 66:13-14

dodolisama, te olo bidi bugagia dugulaluabo se isiabaso da, teda tede noma sigio. Magi baso meni. Te kolesaga page e tiwai elalubao. Te ofisa dabego te tobage kolesaga ebao, augwali te augwa bos tonalubo bidigo osolama, te augwaliba sege muani. Tama te bos tonalubo bidi dabe augwali tobolu ugadu elalubo bidi dabe bidibaso, te augwaligo me te tobage deli tigi poai kolesaga ebo dao. ⁹Te tama kolesagade te ofisa dabe augwaligo te we bidi dabe augwa tode sali mone te ugwadu gasa daganobo mone dali saibao. Tama te ofisa dabego te sali mone dabe augwa hasi tomode digi dobola sali. Tama king bidigo me te we bidi dabede sali mone te gasa ugadu daganama sabo dao.

¹⁰ Te bidigo haligade te mone hauwa sabo homu
 hogodalobaso da,
 teda sesemane sogo aga homude
 aga mone saqa pabo homu idueibao.
 Te mone bidi pedelabo homu ebo bidi yaibaso da,
 teda agai te sali nai sibi tigidaligo
 aga usu nisabo homu eyu ebao.
 Tialima, te mone godolo ebo homu kolesaga iduali da,
 te aga page meni yai elalubao.

¹¹ Te bidigo sabo mone ugaba holobaso da, teda te abagi hauwa asudu gebo se elama, aga dali bidagasaibao. Tialima, te bidigo aga mone dabe elalubo suali, tiali goli agai aga doado bage abela usu meni yaibao. ¹² Te se bidi dabe augwa bugagia hulide godege pibo dao, te augwaligo nai hauwa elaluali, ma te augwa nai saqa paibaso me tagalao. Tialima, mone bidi da, te tiwai me egobeo. Agai aga te nai doado bage homu hauwa dogia pelama, tibaso aga godege bugagia me pigobeo.

¹³ Eno suali, e tode dwai kolesaga mu me deli elalubao. Te kolesaga e tiwai dao. Bidi me deligo aga mena nai godolo homu mu aiyaba elaluama, te nai dabe me abeligobeo. Menio. Agai aga mone bugagia mu sabodu tonalubo dao. ¹⁴ Tiali goli nosali, aga mone sabo se yali bisnis tulaluama, tama aga mone tigidali te hagawaibao. Tialima, agade te nai me deli elalusiama, te aga isibo si, teda aga ogwago sabo nai meni yaibao.

¹⁵ Te idago da ame nani sogo,
 dago nai me deli meni yai elaluali.
 Dago tigi habu olo naga elaluali.
 Te tiwai naga, da isibo sogo,
 da olo naga mu paibao.
 Mu tama, dago te nai hauwa sabo se dene yali,
 tiali goli dago te nai deli me sela pogobeo.ⁱ

ⁱ 5:15 Jop 1:21; Tib 49:17; 1 Ti 6:7

¹⁶Te me te dwai kolesaga mu elalubao. Da te t̄odu nai meni yai bage naga pedelali. Te tiwai naga dago te dago te t̄o tagalobo te tobage deli kolesaga naga yaibao. Te da t̄ode bidibo sogo, da te odolali s̄e dene ebao, te bidi udulama, te wali nogogo tola sainu ebo tiwai ebo dao. ¹⁷Da e t̄ode dugulalubo page te wiegi yai me elalubeo, te sesemane sogo dago haliga s̄eḡe eyu, wado po weyu, gasi siyu, idubo dao. ¹⁸Eno te s̄ede homu koneama, tama eno koneani, te kolesaga me deli uga ela holai elalubao. Te kolesaga e tiwai da. Dago nai tuyu, āi tuyu eyu, te dago tigidali naide s̄e dene yali te wiegi yai pemene eyu, te p̄ewadage sogo Godigo dabolo e t̄ode bidimainu bodolu mani side dago te tama s̄e emainao. Magi baso meni. Godigo dago te s̄e emainu dāi ilai dao.

¹⁹Te Godigo bidi me deliba te mone hauwa menama, tama te bidi aga te nai dabede wiegi yai pemene emainu sula tagalali, te aga ebo s̄ede me, te sula tagalu, te bugagia dugulalubo me te bugai haliga ilibaso da, teda te wiegi yai da. Magi baso meni, te nai dabe te Godigo agabolo te wiegi yai homu pemene ilibo s̄e eyu, te bidibolo mabo dao. ²⁰Godigo aga te sesemane sogo dugulalu, wiegi yai pemene ebo s̄e sula tagalali, tialima te bidi aga e t̄ode p̄ewadage sogo bidabo elalubo homu elama, te aga bidibo moni homu hauwa dogia pelama, me bidigobeo.

Bidabo ulade page me elalubeo

6 ¹Eno suali, te kolesaga dwai me deligo te genuai s̄eḡe te t̄ode bidi dabe augwaliba mobao. Te kolesaga e tiwai dao. ²Godigo te genuai nogi, me te mone doado bage hauwa te bidibolo mawaiabao, tama te bidi aga godolo ebo nai me deli agade me s̄ā pogobeo. Tiali goli, Godigo te bidi aga te nai dabede wiegi yai pemene emainu sula tagalobeo. Tama nosali, te gasa hani bidi me deligo te nai dabe saibao, tama aga te naide wiegi yai pemene dogia paibao. Te tebo kolesaga te dwai mu elama, te aga page meni yai mu elalubao. ³Te bidi me deligo wai dabe te bidi sese a naga, te 100 elaluali bidi te kibu be hauwa bidali. Tiali goli, aga wiegi yai doado bagede wiegi yai pemene is̄ayu, tama te aga isibo sogo augwaligo aga bugagia me pubalusiyau da, teda te dwai mu yali. Eno mu po tama obao, te wai b̄ō me deli aga idago haligade isali waigo, agai te bidi aiyaba elalualio, te bidi te umabo hauwa kibu be te t̄ode bidali digi tagalao. ⁴Te tobage wai da, te olo nai tiwai da, aga nogi menio, te augwaligo aga pubulali sogo, augwaligo aga homu kone ma ebeo. ⁵Te wai b̄ōgo te giliga ula me subeo, te mena nai me deli agai me konebeo. Tiali goli, megī aga bugagia toma neyu bidibao, tialima te waigo dugulalubo pagego te nai doado bage hauwa elaluali bidigo dugulalubo page agai aiyaba elaluali. ⁶Magi baso meni, te bidi agai aga te nai doado bagede wiegi yai pemene homu menis̄awai. Te bidigo kibu be te bidi sese umabo, te 1,000, ma 2,000 kibu be bidali goli, agai te wai b̄ō aiyaba me elalubeo. Da tigidali isilama, te bulu deli naga paibao, te mu da, agawe?

⁷Dago nai tuabo homu elama, te dago sesemane sogo sę ebo dao. Tialima, dago te sela tubo naigo, te dago godolo yali homuba me usu nugu pogobeo. ⁸Magi baso te kolesaga koneani bidigo te kolesaga konesiawai bidi aiyaba elalubo dawę? Te magi nai meni yai bidigo wiegi yai kolesaga te we bidi augwaligo gedude ebaso da, teda tego aga magi elama tau saibawe? ⁹Te dago dena elalubo naide dwagi yai homu pemene eyu bidao. Te kolesaga ebogo te haniani naide pesa ebo kolesaga aiyaba elalubo dao. Te naide pesa ebo kolesaga aga page me elalubeo, te bidi udayu, te wali nogogo tola sainu ebo tiwai naga ebao. Te dago sali nai dabede wiegi yai homu pemene ebaso, usu yaibao. ¹⁰Tigidali nai pedalubo, te odolali me pedalubeo. Menio. Polobadu mu Godigo po weyu, te augwali pedelao wali gilama, te augwali pedalubo sę ebao. Te Godigo da bidigo kolesaga koneanio. Tibaso, dago aga dali konila po me wagobeo. Magi baso meni, te agai bomogo dago bomo aiyaba elalui dao. ¹¹Dago bobobage po wabosi, te tagalao, te usugobeo, dago aga aiyaba elalugobeo. Dago po olo tama waibao, tama tebogo da tau mu sogobeo. ¹²Da bidi te pęwadage sogo naga te tęde bidibao, te ni noma elaluali te pogo giliga ge sesela saębo si te polo menia sabo tiwai ebao. Te dago bidibo ulago page meni yai elalubao. Tialima, mena wiegi yai kolesaga dago wali pabo usu yabo te dego koneaibawe? Te da isai madigi, te magi nai mu e tęde pedelabo dego mu koneaibawe?

Te haniani homu kolesaga dabe po

7 ¹Te bidi dabego homugo nage wiegi yai bidi da
 homu ebaso da,
 teda te wiegi yai mu da,
 te genuai mone mugo abelebo
 wiegi yai denami ebo
 tigide pibo wel aiyaba mu elaluali.
 Me, nage isibo side,
 tebogo te nago idago nage
 ame nani sogo te aiyaba elalueibao.^j

²Da te bidi isaide te bidi dabe gela wabo beba me paibaso, te wiegi yai kolesaga ebao, tama te genuai nai da tubo beba pabo kolesaga ebo te aiyaba elalubao. Magi baso meni, da tigidali bidi isaibao. Tialima, da tęde bidibo sogo yaibaso, dago tede bugagia homu kone palięo.

³Te dago nai me delide haliga sęęę ebaso, te wiegi yai da, te gisugu wabo kolesaga aiyaba elalubao. Mu dao, te haliga sęęę ebaso, te dago gesabidi hulial sali, tiali goli te tama tebogo da tau sobaso, te tęde kolesaga tigidali bugagia homu kone palumainu ebo dao.

^j 7:1 Prs 22:1

⁴Te nago wiegi yai homu kolesaga elalubaso, teda nage te isali bidide diligi weyu bidibo bidi dabe dali bidabo homu yali. Tialima, te wiegi yai homu elalusiabo bidi dabe, augwali te haniani dobo kolesagade pemene ebo bidi dabe dali bidabo homu ebo dao.

⁵Te wiegi yai homu kolesaga elalubo bidi dabego nage dali wado po weyu, te nage dodolobo po obaso da, teda te wiegi yai kolesaga ebao, tama te wiegi yai homu kolesaga elalusiabo bidi dabego balia weyu, nageba mani genuai nogi te aiyaba elalueibao.

⁶Te wiegi yai homu kolesaga elalusiabo bidi dabego gisugu obaso da, teda augwaligo gisugu wabo te page meni yai elalubao. Awe, te kolesaga te sesane yai bono te siade ulali te podila sabo tiwai yali, tiali goli agai te sene sospen posolo mu ilabo usu egobeo.

⁷Te wiegi yai homu kolesaga elalubo bidi bidali, tiali goli agai bomonama eyu, gasa bidigo mone sobaso da, teda aga te wabo pabo bidigo homu kolesaga tiwai elalubao. Me, te bidi mego te po tu odoyu, te bidi agai gasa bidigo nogode geme mone sabogo te kolesagago agai te wiegi yai homu kolesaga dolai dao.

⁸Te bidi mego se me deli hodolobaso da, teda te wiegi yai kolesaga ebao. Tialima, agai te yali se siminibaso da, teda te se uganu ela holali dao. Te magi nai pedalubo bugagia tonalubo bidigo ebo kolesagago te hagoma homu ebo kolesaga aiyaba elalubo dao.

⁹Nago gasa bidi dali haliga sebe polo mu igio, magi baso meni, haliga sebe polo ebo te wiegi yai homu kolesaga elalusiabo bidi dabego homu kolesaga dao.^k

¹⁰Nago te po wagio, “Magi baso polobadu sogogo te megi sogo aiyaba elalubawe?” Nago te tobage po obaso da, te nago wiegi yai homu kolesaga elalubeo.

¹¹Te tode bidibo tigidali we bidigo
te wiegi yai homu kolesaga
elalubaso, te usu yaibao.

Te wiegi yai mu ebao,
te wiegi yai nai dabe te aya isainu
dabolo mabo tiwai ebo dao.

¹²Wieg yai homu kolesaga te mone tiwai elalu,
tama te dwai sogo pedalubaso, da tau saibao.
Tialima, wiegi yai koneani homu kolesagago
te mone aiyaba elaluali,
te da umabo sogo mu tau siyu,
te da bugagia bidibao.

^k 7:9 Jer 1:19

¹³Te Godigo yali sê tigidalide bugagia homu kone palao. Te Godigo nai me deli nigali te gagea pai elalubaso da, teda dego mu ma dodolaibawe? ¹⁴Te nago bidibo ulade sê dabe te bugagia dolalubaso da, teda nage wiegi yai homu pemene yao. Te dwai sogo nageba pedalubaso da, teda nago te tama homu yao, Godigo te wiegi yai sogo dabolo tagala palu, te dwai sogo me dabolo asomainu tagala palaibao. Tibaso, magi sê nosali daba pedelabo, te dago konebe dao.

¹⁵Eno bidibo ula te olo nai tiwai elalubao, tialima ena te tõe bidibo sogo eno te haniani kolesaga ebo suali. Eno suali, bidi mebago doloba pai kolesaga wali pali, tiali goli te bidi dabe augwali isalio. Te bidi mebago dwai kolesaga ebo eno suali, tiali goli augwali bobage sogo sesabi elama, bidibo dao. ¹⁶Tibaso, dago doloba pai kolesaga wali pabo bomu mu eyu, te wiegi yai homu kolesaga sabo sê igimio. Tiyu, dago dena digi dolobo dao. ¹⁷Te me, dago te tobage dwai kolesaga me te wabo pabo bidi dabego ebo homu kolesaga wali pabo bomu mu igio. Tiyu, dago dena isabo sê asesa selebo sê bomu ebo dao. ¹⁸Nage te tobage kolesaga si tomode bilao. Te God dologoba pelama bidibo bidi yaibaso da, teda agai te magi sê yali te tagalao, te wiegi yai naga pedelaibao.

¹⁹Te taunde tobolu bidi nogo si elalubaso, augwaligo te taun bomu yai pedelabo tau somainu yaibao. Tialima, wiegi yai homu kolesagago te bidi me deli boma pai mu pedelama, te taungo tobolu bidi dabego bomu aiyaba elalubo usu yaibao.

²⁰Te doloba pai bidi me deligo wiegi yai kolesaga sesemane sogo me idugobeo. Menio. Me sogo agai me sêgê sabo dao.

²¹Nago te we bidi augwaligo mibo po tigidali me odogio. Te nago augwaligo wabo poba bugagia olo mubaso da, te naga sê bidigo nage posobo po dwai wabo te nago odobo homu yaibao.

²²Magi baso meni, nago te tiwai koneao, hauwa sogo naga digi nago gasa bidi posobo dwai po wabo dao.

²³Eno te tama homu ebo tigidali bugagia homu kone palali, te aga page mu gegela suainu yali, magi baso meni, ena te homu kolesaga mu konea pabo bidi mu pedelainu yali. Tiali goli, eno homu kolesaga te usu ebeo. ²⁴Te tigidali nai pedalubo page hanilama gegainu ebo sê te genuai mu dao. Dago te digibulu uganu mu elalubo nai, ma te aianu mu elalubo nai, te dago sueinu gegebo tiwai ebao. Tialima, dego mu te nai dabe page elalubo gegelama sueibawe?

²⁵Tialima, eno sãgã dili bomu mu selama dolalu, te eno sê bomu eyu, te tobage wiegi yai homu kolesaga tigidali sabo sê bomu yali. Tama eno te tobage dwai kolesaga page me gegelama, koneabo sê bomu eyu, te wabo pabo bidigo homu kolesaga tiwai ebo gegebo sê bomu ebo dao.

²⁶Eno te tiwai page gegelama suali, te isibo kolesaga te ha ebo nai tiwai dao. Tiali goli, te bidi dali dwai sê yainogo sinabo we te bidi bolo

tubo kę tiwai dao. Te da te ha mu ebao. Te tobage we da, te sųę hagane togobo wa tiwaigo da bidi tola sobao. Te aęai nogo te sen tiwaigo da kalabus ebao. Godigo te bidi me deli godolo ebaso da, teda te bidigo te tobage hagane togobo wa gedelama, wi paibao. Tialima, te hagane togobo wago te seęę sabo bidi dabe tola sobaso, te augwali me geda muyu, ela soagobeo. Mu menio. ²⁷Homu kolesaga mu konea pali bidigo te tiwai po wali, mu tamao, eno te tigidali seę page koneainu seę dua dua ela pelama, tama meęi da, eno te we dabe sibigo kolesagade koneai dao. ²⁸Eno te wieęi yai we me deli geęebo seę yali, tama eno geęebo geęebo seę yali, menio. Te bidi sese umabo hauwa te tausen we bidi dabe tomode, eno suali, te deli deli wieęi yai bidi bidali. Tialima, eno te wieęi yai we deli bidibo me subeo. ²⁹Godigo te we bidi dabego sunumi daę ilali, te augwaligo wali pabo seę dene ebeo. Tialima, augwa digi te tobage homu kolesaga hauwa pedelali, te tama teyu, te augwali bilibo sinabo seę mu ebo dao.

8 ¹Te kolesaga page mu konea pali bidigo naga te mena ebo page mu koneaibao. Tialima, deęo mu te kolesaga page mu koneai bidi aiyaba elalueibawe? Te bidigo gesabi hulua sobaso da, teda wieęi yai homu kolesaga igulubaso, te aga gesabidi ula ma ebo dao.

Nago te kingo po wali pao

²Eno te tama po obao, nago te kingo po wali pao. Nago te Godigo gedude te bomai po daę waliyu, nago te kingo wabo po wali paibao po wai dao. Nago te bomai po daę wali te homu kone palama, tama nago te kingo po me sela sanamu dao. ³Nage te king dali bidibaso da, teda nago asesa polo te king tagaligio. Te nago king dali po konila obaso da, teda nago bomo elama mu wagio, magi baso meni, king aga digi aga homu wali pabo dao. ⁴Te kingo mena po me obaso da, teda tigidali bidigo te po wali pabo dao. Te niwai bidi deligo agabolo me hanalugobeo, “Magi baso nago te tiwai yaibawe?” te wagobeo. ⁵Te kingo po tigidali wali pabo bidi yaibaso, te aga bugagia bidaibao, me tede te konea pai bidi mugo te magi seę yabo sogo bodolu munama, te seę yabo sunumi konealueibao. ⁶Magi baso meni. Te da bidi dabego seęę genuai mu pedelali digi tagalao, te tigidali seę dodolabo sogo daę ilali elalubao. ⁷Te mena seę nosali pedelabo dago konebeo. Te seę dabe yaibao po mena bidigo dabolo me wagobeo. ⁸Te isibo sogo, te dago tigde homu ogwa wai tomode bidali mobo bidi tagalainu ebaso, te dago palibaso, usu egobeo. Te dago isibo sogo bodolu hasegelainu ebaso, usu egobeo. Te hwıbo sogo, te ami tobolu bidi ofisa bidigo te aga ami bidi dabego te boi hwıbo pesage tagalama, te augwa buluba ma begasa pomainu sula tagalogobeo. Te tiwai me, te bidi meęo dwai kolesaga wali pobaso da, teda aga te kolesagaba mu dagana selama, te tagalainu ebaso, usu me egobeo.

Dago te pemene ebo kolesaga wali pinao

⁹Te we bidi augwaligo te tobage sę tigidali te tōde ebo sogo eno sulama, te sogo eno homu kone palobo sę yai. Te sogo eno suali, te genuai bidi dabego te gasa we bidi dabe aiyaba elalubo sę ebo suali. Tama te dwai sę ebogo augwa digi aiyaba elaluali, te me eno suai dao. ¹⁰Me sogo te bidi dabe augwaligo te dwai bidi me deli isali te gų pageba pubaligi pabo eno suali. Tama te we bidi augwa te gų page tagalama, te dwai bidigo dwai kolesaga eyu bidali taunba ma begasa asali. Te augwali aselabo sogo, te we bidi augwaligo te dwai sę yali bidi nogi ugaba sali. Te tama tebo kolesaga me aga page meni yai elalubao.

¹¹Me sogo te bidi me deligo dwai sę elama, tama augwaligo agade po tų elama, te agaba mabo dene po dodolama elalubao. Tiali goli, augwaligo sesabi elama, te dene agaba mabeo, aga olo bidali. Tama tibaso, te tama tebo sęgo te we bidi dabe augwali homu hodolama, te augwaligo dwai kolesaga ebo bomu elama yaibao. ¹²Me sogo te dwai sę sę sabo sę ebo bidi dabego te dwai sę hauwa yali, tiali goli augwali bobobage sogo sesabi elama, te tōde bidu, te augwali polo me isibeo. Eno koneani, te bidi dabego te tama po waibao, “Te God dologoba bidigi pali bidi, te bugagia bidibo dao,” po wabo dao. ¹³“Te dwai kolesaga ebo bidi da, te aga bugagia me bidigobeo. Te aga pęwadage sogo naga te tōde bidaibao, magi baso meni, aga te God dologoba pelama bidibeo.” ¹⁴Mu tama, augwaligo te tama po wabo dao, tiali goli eno suali, te gasa kolesaga pedalubo eno suali, te augwaligo po wali tiwai gilama pedalubeo, tama te kolesaga mu geda muani. Me sogo te doloba pai kolesaga ebo bidi te dwai dene sali, te dwai bidi dabego sabo sę usu te doloba pai bidigo saibao. Tialima, te dwai sę ebo bidi dabego te doloba pai bidi dabego sabo sę usu te augwaligo sali. Te tama tebo kolesaga te aga page meni yai elalubo dao.

¹⁵Tialima, eno homugo te wiegi yai da homu ebaso, te dago wiegi yai pemene ebo kolesaga wali pabo homu ebao. Te dago wali pabo gasa wiegi yai sunumi me elalubeo. Tibaso, dago te nai me aų tuyu, te nai dabede dago wiegi yai pemene inao. Mu tama, dago sę ebo sę dene mu yali, tialima dago te pemene ebo kolesaga wali peyu, te tigidali side Godigo da e tōde bidimainu sula tagalali sogo, te dago wiegi yai pemene inao.

¹⁶Eno te wiegi yai homu kolesaga sabo sę bomu eyu, te tobage sę dabe te bidi dabego te giligade me hulide ebo sueinu yalio. ¹⁷Tama eno te Godigo yali sę tigidali sulama, te eno koneai, dago e tōde pedelali nai dabe page gegainu yali usu isąwani. Te dago sę dili budulama, te dago gegelama suabo sę dene yali digi, tagalao, dago usu egobeo. Te homu kolesaga konea pali bidi dabego po weyu, augwaligo te nai dabego page konea pali po obaso, te tagalao, augwaligo te mu po me wabeo. Augwaligo me te page koneainu gegebo usu meni ebo dao.

Deli tigi poai sę da tigidaliba pedelaibao

9 ¹Eno te nai dabede bugagia homu kone palama, tama te tiwai eno koneanio, Godigo digi te doloba pai bidi dabeba pedelabo nai dabe daꝓ ilali, te wiegi yai homu kolesaga elalubo bidi dabeba me tama tialio. Agai te nai dabe godolo yabo sogo daꝓ iliyu, te nai dabe godolo isiabo sogo daꝓ iliyu yali. Te magi nai nosali pedelabo te dago konegobeo. Ma, dwagi yai sę pedelaibawe, ma dwai sę daba pedelaibawe, te da bidigo konebeo. ²Tialima, te nai me deli da tigidaliba pedelabo elalubao, te da doloba pai bidi, ma dwai bidi, ma da wiegi yai bidi me, ma da meda meni yai bidi me, ma da God gedude meda yai bidi me, ma ofa yai bidi, ma ofa isawai bidi yaibaso, te tagalao. Deli tigi poai sę te wiegi yai bidiba me dwai sę ebo bidiba pedelaibao. Te deli tigi poai sę te Godiba po daꝓ wali bidiba eyu, te Godiba po daꝓ wasiawani bidiba pedelaibao. ³Deli tigi poai sę da tode bidi tigidaliba pedelaibao, tama te sę dolo me elalubeo. Te we bidi augwali tode bidibo sogo, dwai sę ebo kolesaga dali, te wabo pabo bidigo kolesaga tiwai dali, te augwaligo haligade paꝓanalubao. Tama nosali, augwali isiyu, tama te polobadu isali bagego hani tomoba pabo dao. ⁴⁻⁵Te bidibo ula elalubo yowigo te isali hasa laion aiya elalualio. Te te tiwai naga, te bidibo ula elalubo bidigo te isali bidi augwali aiyaba elalubao. Magi baso meni, te nai me deli augwaliba pedelabo te augwaligo koneanio. Augwaligo koneani, te augwali isaibao. Tialima, te isali bidi dabego, augwaligo magi nai deli me konebeo. Te augwaligo wiegi yai nai munu me sogobeo. Te bidi dabego augwali homu kone gegeda palali dao. ⁶Te we bidi augwali isibo sogo, te mena nai godolo yali, me te wado homu yali, me te augwaligo mena nai pesa yali, te tigidali silalio, tama te we bidi dabe augwaligo magi sę deli munu me te tode me egobeo.

⁷Tegao, nage pelama, nai tulama, wiegi yai pemene yao. Nago te wain aꝓ tulama, te bugai haliga yao. Godigo te kolesagade usu da po wai dao. ⁸Sesemane sogo nage bugagia au elama, pemene yao. ⁹Dago bidibo ula te olo nai tiwai ebao, te aga page meni yai elalubao. Tialima, nago te we deli godolo homu mu ebaso da, teda tigidali side te Godigo nage da olama, daꝓ ilali te tode bidibao, nago te we dali wiegi yai homu pemene yao. Godigo te kolesaga yabo sę nageba daꝓ ilali, te nage tode bidibo sogo nago te sę emainogo yali. ¹⁰Te nago sę me deli ebaso da, teda nago saꝓa dili tode daꝓ walama dolalu, te sę mu tama yao. Magi baso meni, te nago sę me isiayu, ma homu kolesagade kone paliyu, ma te wiegi yai homu kolesaga konea sabo sę te isali bidi dabego bulude me egobeo, te nage pabo bulude te tama sę dabe me egobe dao.

¹¹Tama eno nai me deli ma te tode سوالio. Te bomonama mu udabo bidi dabego te sainu uda yali nai me sogobeo. Te boma pai ami bidigo

te boi bidi dali hwiņama, ugaba boi bidi hani me aiyaba elalugobeo. Te wiegi yai homu kolesaga me, ma te genuai kolesaga sai bidi dabe, augwaligo te mone hauwa me sogobeo. Te haniani se ebo kolesaga usasai bidi dabe, augwaligo te genuai se me sogobeo. Te magi magi se dabe te da tigidaliba pedalubo dao. ¹²Te magi genuai sege daba pedelabo dago konebeo. Te dwai segego da polo tama mu deli sogo gegaibao, te hagane mubo nai wago te sugu ma ba tola sabo tiwai ebo dao.

Te bidi dabego wiegi yai kolesaga me dwai kolesaga ebo po

¹³Te se me deli pedalubo eno suali. Te wiegi yai homu kolesaga elalubo bidigo te wiegi yai se ola mobao, eno te tama homu yali. Eno te tiwai se ebo sualio. ¹⁴Te dwasianu hanu taun me deli elaluali, tama we bidi hauwa te taunde bidibeo. Te bomai king me deli te aga ami bidi dabe hauwa dali aselama, te boi hwiņama, te taun sainu yai. Te ami bidi dabego te taun bagulama, tama te taun bagulali masigi obo aluabo nai dabe nigalio. ¹⁵Tialima, te taunde magi nai meni yai bidi me deli bidali, tama te bidigo koneani homu kolesaga wiegi yai mu elaluali. Te agai wiegi yai homu kolesagago, agai te taun te boi bidi dabego nogode ma sabo sunumi gegelama sualio. Tiali goli, nosali te bidi dabego te magi nai meni yai bidi homu kone munu ma ebeo. ¹⁶Te tiwai dabolo ola manio. Wiegi yai homu kolesagago te genuai bomo aiyaba elalualio. Tialima, te we bidi dabe augwaligo te tama homu yali, te bidi me deli magi nai meni yai bidi bidibaso da, teda agai wiegi yai homu kolesaga elalubo te olo nai tiwai da homu ebo dao. Tibaso, augwaligo agai po odoba homu ebeo.

¹⁷Te wiegi yai kolesaga elalubo bidigo dua dua wabo po dago odobaso, te wiegi yai dao. Te tobage bidigo pogo te wiegi yai homu kolesaga elalusiabo bidi hanigo tobolu bidigo genuai hae wabo bidi aiyaba elalubo dao. ¹⁸Wiegi yai homu kolesagago te boi hwiņo nai aiyaba elalubo dao. Tiali goli, bidi me deligo dolo meni yai kolesaga ebaso, agai te wiegi yai kolesaga hauwa dolobo se ebo dao.

10 ¹Te bolia dabe te wiegi yai denami ebo wel
elalubo botol tomoba pelama,
te augwali isibaso da, teda te wel tomode dwai
kugumini yaibao.

Te tiwai naga, te bidi me deligo
te wabo pabo homu kolesaga dwasianu ebaso da,
agai te aga wiegi yai homu kolesaga dolama,
tama aga digi genuai nogi dolaibao.

²Te wiegi yai homu kolesaga elalubo bidi
agai wiegi yai kolesaga ebo dao.
Tialima, te wiegi yai kolesaga elalusiabo bidi,

- agai te dolo isawai kolesaga ebo dao.
- 3 Te bidi te sunumidu naga bilali goli tagalao,
agai kolesaga te tiwai
gasa bidi dabeba ola mani,
aga wiegi yai homu kolesaga elalusiabo bidi dao.
- 4 Te naga tobolu bidigo nageba wado po obaso da,
teda nago naga se me tagalamuo.
Te nago sali sege genuai elalubadi digi, tagalao,
te nage bugagia dua digi bidibaso da,
teda agai nago sali sege te tagalaibao.
- 5 Eno suali, genuai sege me deli
te bidi dabe mebago yali,
te se yabo page te tobolu bidide
naga elalubao. E tiwai dao.
- 6 Te tobolu bidi dabego te genuai se
te wiegi yai homu kolesaga
elalusiabo bidi dabeba mawai,
tama te mone hauwa elalubo bidi dabego se sali,
te wiegi yai se me sabeo.
- 7 Tama me eno suali, te olo se ebo bidi dabe
te hos kibu daide ugadu dugulasa pabo suali,
tiali goli te genuai bidi dabe te sagago pali,
te olo se ebo bidi dabe pabo tiwai yali.
- 8 Te bidi mego genuai to dedage dogobaso da,
teda aga digi te dedageba tulalueibao.
Ma, te bidigo te masigigo bagulali obo alubaso da,
teda te hasamanigo aga gaq kelaibao.¹
- 9 Ma, bidigo te be se yabo masigi togobo se ebaso da,
teda me sogo te masigi dabego aga tigi selaibao.
Te ni pedebo se ebo bidi,
me sogo te nigo aga dolaibao.
- 10 Te bidigo puna pai sigi hwa agai
dulusiawai yaibaso da, teda agai
te ni gelebo sinabo se dene mu yaibao.
Me ma, te wiegi yai kolesaga elalubo bidigo da,
te agai te ni gelebo se wiegi yai yaibao.
- 11 Te bidi mego te hasamani

¹ 10:8 Tib 7:15; Prs 26:27

- dua digi bidimainu ebo kolesaga
 elalubo bidi yaibaso, te wiegi yai da.
 Tialima, te hasamanigo aga gaꝝ kelemainu ilibo bidi
 yaibaso da,
 teda aga te koneani kolesagago aga
 magi elama tau saibawe?
- 12 Te wiegi yai homu kolesaga elalubo bidigo
 aga wabo pogo digi te agaba
 genuai nogi mawaibao.
 Tialima, te wiegi yai homu kolesaga elalusiꝁbo bidi
 te aga pogo digi aga dolaibao.
- 13 Te tobage bidigo po gagalama wabo sogo,
 agai wabo po geda mueibao.
 Te agai po silainu ebo sogo, te po dwai mu pedelali,
 te kolesaga umuna sai bidi mugo wabo po tiwai yaibao.
- 14 Te wiegi yai homu kolesaga elalusiꝁbo bidigo po
 oda pidu gebo dao.
 Te magi se nosali pedelabo dago konebeo.
 Te da isai madigi, magi se e tode pedelabo dago
 konebe dao.
- 15 Te wiegi yai homu kolesaga mu elalusiꝁbo bidigo
 agai te aga beba pabo sunumi gegebaso,
 usu meni yaibao,
 te tobage bidigo odolali se dene eyu,
 te aga bomo sia sabo dao.
- 16 Hobede yao! Te to kantri pedai king me deli
 te ogomani homu tiwai elalubadi,
 tama te kantrigo polalubo bidi dabego
 te kigamu digi hodolama,
 te nai da naga tueinogo ebaso da,
 teda genuai sege te to pedai kantriba pedelali.
- 17 Me ma, te gasa to pedai kantri king
 me deli te genuai bidigo ogwa yaibaso,
 tama te to kantri polalubo
 bidi dabego te genuai nai da tuyu,
 te ai tuyu yali te sogo,
 te tigi naga daꝝ walobo se naga eyu,
 te geꝝ page isaꝁbaso da,
 teda te to kantri bugagia mu bidai dao.

18 Te bidigo aga sę ebo hagela eyu da,
 te aga be walawala ni dabe gaga paibao.
 Awe, aga olo naga bidibaso da,
 teda te be pedu tologa pelama,
 te tulubage be tomoba pelama, te be dolobo dao.

19 Naigo te bidi pemene ilibo sę ebao,
 te wain ąigo te bidi bugai haliga ilibo dao.
 Tiali goli, mone da, te wiegi yai nai te tobage sę
 tigidali ebo dao.

20 Te naga pibo be habu badu
 geme dualalu pila muani,
 te tagalao, nago te dwai posobo po te kingbolo
 ma te mone elalubo bidibolo me olamuo.
 Tama me, nago augwaliba dwai homu me igio.
 Tiyu, te ba me deligo nago te wabo po selama,
 te augwaliba wagi pidali weyu.

Bugagia homu kone palama, sę yao

11 ¹Nago sę tigidali pedai badu ebaso,
 te nosali nago yali sego dwagi yai du walaibao.

² Nago konebe, mena sogo dwai sę
 e tōba pedelabo elalubao,
 tialima nago mone sabo bisnis
 sunumi te nogo a naga olama,
 me badu si, ma a naga olama, me badu sela,
 te badu munama elalumainao.

³ Te haowade ąi pągąna pobaso da,
 teda tulubage te tōba tulaibao.
 Te ni degali saut badu elalubaso, me not badu elalubaso,
 te tagalao, teda aga te ni degali
 pesagede munalubo dao.

⁴ Nago te wali me tulubage wiegi yai
 asobo tonalubo sogo yaibaso da,
 teda nago te gi sę elama, te inawai nai sela tugobeo.

⁵ Godigo tigidali nai nigali.
 Tialima, te waligo wali pabo tų
 menadewe, te dago konebe.
 Ma, magi elama te gesi wai bų te idago haliga tomode
 bidibo ula elaluali, te me dago konebeo.

Te tiwai naga te Godigo ebo se dabe
te dago koneabo usu meni ebo dao.

6 Nago te nai wai hani te kigamu meba wasilama buliyu,
te pio meba wasilama buliyu yao.

Nago konesiawaibao, te nago kigamu wasilama
bulali nai wai, ma te pio naga bulali nai wai
bugagia holobowe,
ma te nani si dali bugagia holobo, te konegobeo.

7 Ula te wiegi yai nai dao.

Te dago giliga ula sulama,
dago wiegi yai pemene ebo dao.

8 Da tode bidalubo tigidali kibu bede
dago wiegi yai pemene yao.

Te dago kibu be hauwa bidali digi, tagalao,
dago te se de homu kone gegeda paligio.
Te da kibu be hauwa mu te da isali bidi dabego
hulia sai bulude bidaibao.

Tigidali se nosali pedelabo elalubao,
te augwali olo nai dabe tiwai naga dao.

Te ogwa bidi dabe ola mabo po

9 Dage gesi ogwa bidi dabe,
dagego te dage gesi tigi elalubadi,
wiegi yai pemene yao.

Dagego te duga homugo godolo homu wali pobao.
Tiali goli, dua da, Godigo dagego yali
kolesaga te agai po tude dagalaibao.

10 Te dago gesi bidi bidibo te sesabi
elama, bobage sogo mu bidigobeo. Menio.
Te olo nai tiwai elalubao.

Tialima, dageba te nai dabego sege mobaso,
te dagego homu hauwa igio.

Tama dagego te duga tigiba dene mabo
kolesaga wali pelamo dao.

12 ¹ Godigo da tigidali nigali.
Tibaso, dage gesi ogwa bidi
bidibadi digi dagego aga homu kone palao.
Tiyu, dagego aga homu kone gegeda paligio,
tama nosali dage monu dabe pedalubo side
te dwai segego dage gegebaso,
te dage deli deligo te tiwai po waibao,

- “Eno ena bidabo ulade wiegi yai
 homu pemene ebeo,” po waidali weyu.
- 2 Te sogo dagego gedu dwai elalubaso,
 dagego te tiwai homu yaibao,
 giliga, me polua, me te hɔ dabe,
 te bugagia ula isiɔyu, tama te haowa tulubage
 sesemane sogo elalubao po waibao.
- 3 Te sogo dagego nogo bomo
 munu ma isiɔma, te midigi saibao.
 Te dagego saɔa bomo menisaɔma, gagea paibao.
 Te dagego kele me deli deli naga elalueibao,
 tama dagego te dila pai nai me tugobeo.
 Te dagego gedude me dwai elama,
 te dagego nai dabe bugagia
 tonono bilibo usu egobe dao.
- 4 Tama dagego olo te palia selama,
 tama te be bulu badu kilikili wabo odisiɔyu,
 te masigigo wit peɔebo tiwai eyu,
 tama te musik haniani u wabo tiwai yali.
 Tialima, te dage godege piai digi yaibaso da,
 teda te ba po wabogo naga dage hodolaiabao.
- 5 Te bulu dabe daide ugwadu dage bidalu,
 tama dage te sunumidu bilabo wi yaibao.
 Dagego tobolu nisi te tedela yai pedelama,
 tama dage te sunumidu bilibo se dene yaibao.
 Tama te nai dabego dage haliga
 hogodolabo se me iligobeo.
- Te dage isilama, tama duga sesemane sogo bidada peyu,
 bidada pabo buluba bidigi paibao.
 Te duga taunde bidibo we bidi dabego,
 te augwaligo gela weyu,
 hobede ebo balia po waibao.
- 6 Dage isisaɔbadi, dagego Godiba homu kone paliɔ.
 Dage isibo sogo, te wiegi yai lam sole ula sia sabo
 tiwai yaibao,
 te silvago nigai sen toga peyu,
 ma te golgo nigai pou dis alua pabo tiwai yaibao.
 Tama te ulu aɔ dedagede ugaba kekebo
 dwasianu nai winis toga peyu,
 tama te aɔ tuali togo nigali sospen
 tulaluama, alua pabo tiwai ebo dao.

- 7 Tama dagego tigi te t̄ ma pedelaibao,
tama Godigo dagebolo te mani
homu ogwa wai mobo bidi, te God agaba ma paibao.
- 8 Kolesaga mu koneani bidigo te tama po walio,
“Tigidali nai te olo nai tiwai naga elalu,
tama aga page mu meni yai elalubao,” wali.

E bukugo silagasu wabo po

9 E buku aṣani bidigo koneani kolesaga wiegi yai mu elalubaso, tama agai te we bidi dabe augwali ola manio. Agai te tobage wiegi yai po dabe me begelama pusubo po bugagia dagalama wali, tama agai homugo te po dabe mu po da homu ebaso da, teda agai te po dabe e buku aṣai dao. 10 Agai te bidi dabego ologo odolama, pusu yabo po dabe gegebo ṣe dene elama, tama agai te mu po dabe naga bugagia gegelama, aṣai dao. 11 Te kolesaga mu konea pali bidi dabego po te poa pali dono dabe tiwai elalueibao, te sipsip kibu dabe gasaba bogeasa soyu ebaso, ela palu, ela soabo dono te sipsip tonalubo bidi dabego sabilaiibao. Te kolesaga konea pali bidigo te buku me delide wiegi yai po elalubo subaso da, teda te po sesabi elama, sesemane sogo elalueibao, te nili dabe te ni namede ḍuḍu elalubo tiwai yaibao. God, da tigidali tonalubo bidigo, te po dabe dabolo mawai dao.

12 Eno waio, eno po me deli mu ma nagebolo wabo homu ebaso. Te buku aṣeḅo bidi dabego te buku hauwa mu aṣeḅo dao, tama te tobage ṣe silabo me elalubeo. Te nago te buku sesemane sogo nedebo ṣe ebaso da, teda nago tigi hagela yaibao. Tibaso, nage te kolesaga ebode dua dao.

- 13 Te tigidali po siminagasu, eno te tiwai po obao,
te da bidigo bidibo ulade polalubo ṣe
te tiwai elalubao.
Dago God naga dologode bidiyu,
tama agai bomai po dabe wali pao.
- 14 Godigo dago ebo kolesaga tigidalide da po t̄ ilaibao,
te wiegi yai kolesaga dabe me,
dwai kolesaga dabe me, te geme dualama
ebo kolesaga dabede me, da po t̄ ilaibao.